


JALAN-JALAN LAWAT LADANG



SALAH seorang pelajar sedang melaksanakan amali di ladang ternakan lembu.

LOKASI MENARIK PROGRAM EDU-PARK UPM

- Galeri Serdang • Taman Konservatori UPM
- Ladang rusa • Ladang tenusu • Pusat Ekuin
- Muzium Anatomi Manusia • Muzium Anatomi Haiwan

RATA-RATA rakyat negara ini sedar akan kepentingan sektor agro dalam memastikan sumber makanan sentiasa terjamin. Lihat sahaja sambutan orang ramai ketika Pameran Pertanian, Hortikultur dan Agro Pelancongan Malaysia (MAHA) di Taman Ekspo Pertanian Malaysia (MAEPS), Serdang, Selangor sebagai bukti.

Peminat-peminat sektor agro sanggup datang dari segenap pelusuk negara bagi menyaksikan pameran tersebut.

Universiti Putra Malaysia (UPM) yang ditubuhkan khusus untuk mengembangkan pertanian turut menyedari akan potensi sektor tersebut untuk dijadikan sebagai produk pelancongan.

Menurut Pengarah Taman Pertanian Universiti (TPU) UPM, **Prof. Dr. Japar Sidik Bujang**, pelancongan disektor pertanian dikenali sebagai Agropelancongan.

Jelasnya, agropelancongan telah lama diperkenalkan oleh pelbagai agensi kerajaan yang terlibat mahupun dipihak swasta.

"Contoh terdekat yang kita boleh lihat kerancakan sektor

Oleh **ASHRIQ FAHMY AHMAD**
ashriq.ahmad@utusan.com.my



Agropelancongan di Cameron Highland yang menjadikan buah strawberi dan teh sebagai ikon tanah tinggi tersebut.

"Tidak terhad kepada produk pertanian, produk ternakan juga turut mendapat perhatian peminat-peminat sektor ini," katanya ketika ditemui di Serdang, Selangor baru-baru ini.

Bagaimanapun, di UPM, khususnya TPU mereka menawarkan satu lagi penambahan di dalam sektor Agropelancongan iaitu pendidikan menerusi program Edu-Park.

"Edu-Park menawarkan lawatan berpandu ke setiap pusat-pusat penyelidikan berkaitan agro dengan kadar bayaran yang minimum.

"Orang ramai kini berpeluang untuk melihat sendiri kajian dan pembangunan (R&D) berkenaan pertanian dan penternakan.

Jelas Dr. Japar Sidik, sebagai sebuah universiti tertua

dan berlatar belakangkan pertanian, UPM memiliki kemudahan dan lokasi yang sesuai untuk tujuan tersebut (agropelancongan).

"Terdapat 10 lokasi menarik di UPM boleh dilawati pelancong seperti Taman Konservatori Pertanian, Muzium Anatomi Manusia, Pusat Ekuin dan ladang rusa, lembu serta kambing," katanya.

Tambah Dr. Japar Sidik, agropelancongan berteraskan pendidikan (edupelancongan) membolehkan pelancong dari dalam dan luar negara dapat menikmati keindahan dan kemudahan di UPM selain mendapat ilmu pengetahuan sepanjang lawatan.

"Anda bakal melangkah ke alam universiti penyelidikan yang telah bermula sejak tahun 1931 sebagai sebuah Sekolah Pertanian.

"Program ini bukan sahaja dapat menarik minat golongan dewasa malah menanamkan minat dan semangat pelajar untuk memasuki mana-mana institusi pengajian tinggi selepas mereka menamatkan pengajian di alam persekolahan," katanya.




DR. JAPAR SIDIK BUJANG





UPM menerusi program agropelancongan yang diwujudkan menawarkan lawatan terus ke ladang-ladang haiwan ternakan kepada pengunjung yang hadir.

SEKUMPULAN pelajar perubatan veterinar sedang berbincang mengenai ladang.



Populararkan ladang ternakan

SELAIN taman herba, pengunjung yang berminat dengan haiwan ternakan boleh ke ladang tenusu contohnya.

Kawasan ladang yang luas memberi kelebihan kepada UPM untuk memelihara lembu.

Terdapat dua ladang lembu iaitu lembu tenusu dan lembu daging. Di kandang lembu tenusu, pengunjung berpeluang untuk melihat proses pemerahan susu, memberi minum susu kepada anak lembu atau sekadar mengambil gambar.

Lebih menarik UPM turut memiliki ladang rusa yang berfungsi sebagai pusat

penyelidikan, pembelajaran, pengeluaran dan untuk dijual.

Terdapat hampir 200 ekor rusa di ladang tersebut dan sesetengahnya amat jinak dan boleh dibelai dan bermanja dengan pengunjung.

Pengunjung juga berpeluang bergambar secara dekat dan memberinya minum susu botol.

UPM turut menawarkan daging rusa pada kadar harga RM35 sekilogram atau seekor berharga antara RM1,200 hingga RM1,600.

Namun, jualan hanya dilakukan jika terdapat bilangan rusa yang berlebihan di ladang tersebut.

Selain pusat-pusat

penyelidikan, UPM turut memiliki gerai khas yang dikenali sebagai Putra Mart untuk menjual produk keluaran penyelidik UPM pada kadar harga yang berpatutan.

Setelah penat meneroka sekitar UPM, pastikan anda singgah sebentar di L'Apprenti yang merupakan sebuah restoran khas dikendalikan staf dan pelajar Fakulti Sains dan Teknologi Makanan, UPM untuk membasahkan tekak mahupun menjamu selera.

Untuk mengikuti ke semua atau sebahagian program-program tersebut anda perlu menempah terlebih dahulu dan

sedikit bayaran akan dikenakan namun amat berbaloi dengan pengalaman yang anda peroleh.

Terdapat beberapa pakej yang disediakan malah pihak Edu-Park UPM juga boleh mengaturkan program khas buat pengunjung berdasarkan permintaan dan bilangan pengunjung.

Untuk maklumat lanjut anda boleh melayari laman web Edu-Park di www.edupark.upm.edu.my atau hubungi mereka di talian 03-8947 1413 dengan sambungan 1414 atau 1419 dan waktu panggilan terhad bermula pukul 8 pagi hingga 1 petang sebelum disambung pada pukul 2 petang hingga 5 petang.